

**Najib Lakukan Tinjauan Mesra Ke Bazar Deepavali Jalan Masjid India
Bernama
11 November, 2012**

KUALA LUMPUR, 11 Nov (Bernama) -- Perdana Menteri Datuk Seri Najib Tun Razak melakukan tinjauan mesra ke bazar Deepavali di Jalan Masjid India di sini Sabtu.

Najib memulakan tinjauan mesra pada kira-kira 8.30 malam di kawasan tumpuan masyarakat India, yang menempatkan 70 deretan kedai menjual kain, pakaian, barang kemas dan pelbagai barangan lain.

Ketibaan beliau disambut dengan paluan kompang, tarian singa dan pukulan gendang India.

Najib diiringi Menteri Wilayah Persekutuan dan Kesejahteraan Bandar Datuk Raja Nong Chik Raja Zainal Abidin serta timbalannya, Datuk M.Saravanan, Datuk Bandar Kuala Lumpur Datuk Ahmad Phesal Talib dan Ketua Pemuda MIC T.Mohan.

Selepas beramah mesra dan bersalaman dengan pekerja serta pengunjung, Najib turut menyampaikan sumbangan kepada 30 anak yatim dari Rumah Kebajikan Anbu Illam and Rumah Kebajikan Karunai Illam.

Walaupun hujan, seramai 300 orang tetap menanti kedatangan Perdana Menteri. Mereka juga dihiburkan dengan persembahan artis tempatan dan dijamu makan malam.

Perdana Menteri turut mengambil kesempatan untuk menikmati tose, muruku dan pelbagai lagi juadah tradisional masyarakat India semasa lawatan itu.

Kedatangan Perdana Menteri nyata menggembirakan peniaga dan pengunjung yang tidak melepaskan peluang bersalaman serta bergambar dengan pemimpin itu.

Masyarakat India akan menyambut Deepavali pada 13 Nov ini.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=708576>